

In gir archeologic tras il Grischun

■ Il LIR preschenta ina schelta d'impurtants chats archeologics ch'èn vegnids a la glisch en las diversas regions dal Grischun (en successiun cronologica). Las infurmaziuns davart ils lieus d'exchavaziun derivan dals artitgels geografics respectiv.

Cuira

Ils emprims fastizs umans (chatschaders) dateschan dal temp paleolitic tardiv (11–10 000 a.C.) ed èn vegnids scuverts il 1998–99 en l'intschess dal Marsöl. En il territori da Cuira han ins mess a la glisch dus abitadis preistorics impurtants: in da quels sa chattava da la vart sanestra da la Plessur en il Welschdörfli, l'auter da la vart dretga en l'areal dal Sennhof/Karlihof en la citad veglia. Era en l'intschess da la Curt èn documentadas restanzas d'abitadis preistorics, mo ina pitschna part da quels è dentant vegnida exchavada.

En il Welschdörfli, al pe dal Rosenhügel e dal Pizokel, han ins scuvert tranter il 1967 ed il 1990 restanzas remartgabladas d'abitadis preistorics. En l'areal Ackermann han ins chattà en ina profundità da 5 m in abitadi dal temp neolitic. Da grond'impurtanza èn qua oravant tut ils fastizs d'ina cultivaziun dad ers. Al Markthallenplatz gist dasperas han ins scuvert restanzas d'abitadis da la Cultura da Lutzingüetle e Pfyf da la medema epoca. En l'areal dal Sennhof e dal Karlihof han ins scuvert en ils onns 1980 las structures d'in grond abitadi dal temp da bronz tardiv sco era objects da la Cultura da santeris cun urnas e da la Cultura da Laugen-Melaun (ca. 1300–800 a.C.). Sur quest abitadi han il archeologics chattà restanzas d'in abitadi dal temp da fier tempriv cun objects da l'uschenumnada cheramica da Tumein (6–5avel tschientaner a.C.), ma era chats e rechats dal temp roman e dal temp autmedieval.

Jürg Rageth

Mesocco

Chats archeologics, fatgs tranter la fin dal 19avel tschientaner ed ils emprims decennis dal 20avel tschientaner e durant la construcziun da la A13, han purtà a la glisch fastizs d'umans antics a Tec Nev ed en ils conturns dal chastè: iseglias da crap dal temp mesolitic (ca. 6000 a.C.), ina fuaina dal temp neolitic (ca. 5000 a.C.) e cheramica da la medema epoca. Abitadis pli duravels dateschan dal temp da bronz (avant il 1400–1200 a.C.) e dal temp da fier preroman. Ina necropola impurtanta dal temp da fier tempriv (6avel–5avel tschientaner a.C.) è vegnida scuverta al lieu da la vischnanca odierna, entant ch'ins ha chattà fastizs d'in abitadi roman sin la collina da Gorda; qua han ins era scuvert fossas dal temp medieval tempriv (6avel tschientaner).

Cesare Santi

Cazas

Las exchavaziuns effectuadas sin il Petrus- hügél (1938–40, 1951, 1981–82) han purtà a la glisch in foss pli grond cun ina stresa da cultura (tenor las emprimas exchavaziuns sa tractà d'ina chasa sutterrana dal temp neolitic), pliras fuainas e fuclars, mirs sitgs, suladas e marcaziuns da foras per pals. Ils objects chattads cumpiglian cheramica grossa, sigirs da crap, artefacts da silex e d'auters craps, utensils dad ossa e da cornas-tschier che dateschan da la fin dal quart/terz millenni a.C. Las exchavaziuns dals onns 1981–82 han era mess a la glisch objects dal temp da bronz e dal temp medieval tardiv. Tenor l'interpretaziun actuala vegniva l'areal utilisà stagionalmain per la chatscha, per la pasculaziun sco era per l'exploziun ed elavuraziun da crappa, ossa e cornas-tschier.

Il 1943–44 ed il 1947–70 han ins scuvert la culegna da Cresta che datescha dals temps da bronz e da fier; ella sa chatta sin ina collina en ina chavorgia grippusa, nua ch'ins ha era chattà stresas da culturas da plirs meters grossezza che renvieschan a colonisaziuns dals temps da bronz tempriv, mesaun e tardiv sco era dal temp da fier. Ins ha era scuvert structures d'abitadis dal temp da bronz tempriv e mesaun:



A Cuira/Marsöl èn vegnids a la glisch il 1998/99 ils pli vegls fastizs umans documentads fin qua en il Grischun. FOTO: SERVETSCH ARCHEOLOGIC

chusas en lingia, il traject d'ina via, numerusas chasetas da lain pli simplas cun fuainas e blers chats da la cultura interalpina dal temp da bronz. Jürg Rageth

Tumein

Al pe da la planira auta da Crestis al sidvest da Tumein han ins chattà il 1974 ed il 1976–77 fastizs d'ina staziun dal temp neolitic tardiv (terz millenni a.C.). Ils gronds vaschs (per part da cheramica gropa) ed ils artefacts da crap e dad ossa laschan supponer ch'ì sa tractava plitost d'in edifiz dal sectur economic secundar che d'in abitadi permanent. Durant la construcziun da la via d'autos (1964) han ins scuvert al pe da la collina cun la baselgia in champ da fossas cun 63 baras cremadas. Intginas da las fossas sa chattavan sut terra, autras sur terra; quellas eran munidas d'in rom da crappa quadratic u radund e cuvertas per regla d'ina u pliras plattas da crap. Ellas cuntgevan in fin dus vaschs da cheramica, dals quals in cuntgeva la tschendra da la bara, qua e là vegnivan agiuntads era singuls objects da bronz luentads (per regla cliniez). Ils morts eran senza dubi vegnids brischeds sin il standler.

Tranter ils objects da cheramica dal champ da fossas da Tumein sa chattavan dus tips principals: ils objects dal temp da fier tempriv (ca. 7avel–6avel tschientaner a.C.), colorads cun cotschen e munids cun grafitg stgirs, ed ils objects grischs fin nairs, savens decorads cun ornaments bulads. Quests chats èn enconuschents era sut il num cheramica da Tumein e dateschan da la fin dal temp da fier tempriv (ca. 6avel–5avel tschientaner a.C.). La cheramica da Tumein fa part da la gruppa da la Val dal Rain alpina dal temp da fier. Tipic èn ses dissegns filigrans ed ils elements decorativs en furma d'egls radunds, ghirlandas u musters rudlads, ma era las decoraziuns linearas e las borduras cun finas crennas. Jürg Rageth

Seglias: Carschenna

Aclaun sur la vischnanca da Seglias cun petroglifas preistoricas d'impurtanza internaziunala, scuvertas il 1965 tras in funzionari forestal e rendidas visiblas tras collavuratur dal Museum retic. L'acclaun è situà al nordost dal Crap Carschenna ad in'auzezza da ca. 1080–1110 m. Las petroglifas sa chattan a l'ur d'in spelm marcant, mulà da glatschers. Ellas èn repartidas sin 9–10 plattas-crap en in radius da ca. 400 meters. Ils dissegns èn vegnids stgalprads en il spelm cun ina tecnica speziala e cun agid d'in instrument a piz (stgalper da metal?).

Il motiv principal da las petroglifas è in rudè concentric cun in fin nov tschertgels ordinads per regla enturn ina pitschna cuppa centrala. Dasperas cumparan diversas represchentaziuns d'animals (chavals, chaval da sauma, tschierivs, eventualmain armers) e d'umans (chavalier cun in balester?), chavalier cun ina sort da trianza [adorant?] sco era nume-

rus cuppins colliads per part in cun l'auter tras pitschens chanals. Ulteriurs motifs, probablmain pli giuvens, èn chanals en furma da ziczacs, in rudè cun radis (sulegl?), ina crusch, ina crusch en in rombus, ina cuntracrusch ed il pe d'in uschè.

Damai che l'archeologia n'ha betg anc pudì datar ils dissegns, na pon ins betg attribuir quels a temps exacts. Jürg Rageth

Savognin: Culegna dal temp da bronz sin il Padnal (Mot la Cresta)

Collina marcanta al sid da Savognin situada a la via dal Güglia. Abitadi impurtant dal temp da bronz, scuvert il 1938 da Bonifaci Plaz e da Walo Burkart cun explotar gera. Emprimas exchavaziuns tras Benedikt Frei 1953–56. Retschertgas archeologics sistematicas tras il Servetsch archeologic dal chantun Grischun 1971–83, dirigidas da Jürg Rageth. Runcada cun agid dal feu e fundaziun d'ina emprima culegna en il temp da bronz tempriv (ca. 2200–1700/1600 a.C.). Successiun d'almain tschintg (parzialmain era pliras) fasas d'abitadis (orizonts surpostads A-E) u da vitgs destruids solitmain tras incendis. Lunga stabilitad dal l'abitadi sco era da singuls fundaments.

La pli veglia culegna da l'epoca dal temp da bronz tempriv consistiva da simplas chamonetas da lain construidas sin in fundament da palissadas, probablmain cun paraids da pertgas entreschadas (dimensiun ca. 3x5,5 m fin 4,5x5,5 m). Dal temp da bronz mesaun (ca. 1700/1600–1300 a.C.) datescha in tip d'abitadi a trais retschas cun chasas cun fuainas ch'inizieschan probablmain la construcziun da travs (fragments da chaltschina da chamonas construidas cun travs). In edifiz cuntgeva restanzas metallurgicas (chasa dal ferrer?). In'imposanta cisterna da laresch, construida cun pals e palancas revestgidas cun chaltschina, serviva probablmain a cumbatter il feu ed a drenar la culegna (reservuar d'aua).

A l'entschatta dal temp da bronz tardiv (ca. 13avel tschientaner a.C.) existivan gronds edifizis (ca. 20x6 m) che devan alloschi a pliras famiglias e ch'eran medemmain ordinads tenor il tip d'abitadi a trais retschas. A las chasas d'abitadi eran probablmain anc annectadas stallas ed edifizis d'economia. A partir dal temp da bronz tardiv (a partir da ca. l'onn 1000 a.C.) èn sa midadas las structures da las chasas e dals abitadis (indizis per ina curta interrupziun da la colonisaziun).

Las structures dals abitadis laschan presumar ina concepziun architectonica generala ed in'organisaziun communabla da l'abitadi. Las exchavaziuns han mess a la glisch in'impurtanta successiun da stresas da culturas (da passa 2,5 m auzezza) cun numerus objects da cheramica e divers utensils da bronz sco era artefacts dad ossa e da crap, vaschs da terracotta, perlas d'ambra, objects osteologics, sems charvunads, chaltschina da chamonas, crustas da metal e provas da minerals.

L'abitadi sin il Padnal fa part da la Cultura interalpina dal temp da bronz, derasada en il Grischun, en il Tirol dal Sid ed en la Val dal Rain Alpina. Ils abitants eran purs che vivevan da l'agricultura (dumiec, spelta, furment, salin dubel, arveg, evtl. avaina) e da l'allevament da muvel, nursas, chauras e portgs. La chatscha e la pestga giugavan ina rolla subordinada. Restanzas da crustas e da metals cumprovan l'exploziun e l'elavuraziun da minerals d'arom sulfid en la vischinanza dal Padnal durant il temp da bronz. Furmas da cular e fragments da chazzetas cumprovan che l'arom vegniva explotà ed elavurà ad objects da bronz en l'abitadi sez. Chats dad ambras e numerusas restanzas da cheramica documenteschans in commerzi nord-sid sur ils pass alpins. Da l'oriund abitadi han ins exchavà radund in terz fin maximalmain la mesadad tranter il 1971 ed il 1983. Sin fundament da la clera struttura dal temp da bronz in dumber da 40–50 (il pli vegl abitadi) fin maximalmain 80–90 abitants. Jürg Rageth

Lumbrein: Crestaulta sper Surin

Crestaulta è in impurtant lieu da culegna dal temp da bronz, situà sin la terrassa d'ina collina a ca. 300 m al vest da Surin. Walo Burkart l'ha scuvert il 1935 ed ha interpretà exchavaziuns parzialas il 1935–38. Attestadas èn trais fasas da colonisaziun: en la stresa inferiura dal temp da bronz tempriv (ca. 2000–1700/1600 a.C.) han ins mess a la glisch numerusas foras per pals da simplas construcziuns en lain cun fuclars (chamonas da ca. 6,5 sin 4 m).

Da la segunda stresa, probablmain gia dal temp da bronz mesaun (1700/1600–1500/1400 a.C.), derivan diversas construcziuns cun mirs sitgs per part massivs (che na permettan dentant betg da reconstruir plans d'edifizis), pliras fuainas, in pitschen «tschaler» radund, restanzas d'in furn da vaschler e fastizs d'incendis.

En la stresa superiura, databla en il temp da 1500/1400–1300 a.C., han ins chattà tranter auter fastizs da fuainas, da suladas e d'in palantschieu da lain. Las exchavaziuns han plinavant purtà a la glisch chats da cheramica attribuids a l'uschenumnada Cultura interalpina dal temp da bronz (numnada pli baud Cultura da Crestaulta), en pli iseglias da bronz (farclas, maneras, stiletts, gluvas), artefacts da crap e d'ossa, graunins carbonisads sco era rests dad ossa d'animals e restanzas da metal.

Per quai che riguarda l'appartegnientscha culturala e la posiziun topografica da Crestaulta existan parallelas cun las culegnas dal temp da bronz sin il Padnal (vischnanca da Suagnin). En la cultura da Cresta Petschna, a 150 m da Crestaulta, han ins scuvert il 1947 in pitschen santeiri cun almain 11 fossas a cremaziun dal temp da bronz tempriv e mesaun, exchavadas medemmain da Walo Burkart il 1947–48. L'inventari dals chats (gluvas, penderliezs, bratschlets) lascha supponer

ch'ì sa tractia là da fossas da dunnas che stattan probablmain en connex cun la culegna da Crestaulta. Jürg Rageth

San Murezzan

Il 1853 han ins scuvert durant lavurs da construcziun a San Murezzan Bagn in enchaschament d'aua da funtauna (funtauna da Mauritius), mess a la glisch definitivamain en occasiun dal nov enchaschament da la funtauna il 1907. En la profundità da 1,4 m en ins urta sin dus bischens da lain da laresch, installads en posiziun verticala. Ils bischens avevan in diameter da var 0,8–1,4 m ed in'auzezza da var 1,8–2,3 m ed eran per part emplenids cun belma. Els eran enamads da duas chaschas da lain rectangularas u trapezoidas. La chascha exteriura era vegnida realisada cun laina radunda (construcziun da bloc), quella interiura cun laina squadrada enchaschada (aissas). Il lain bain mantegnì mussava numerus fastizs da l'elavuraziun.

In dals bischens cuntgeva divers objects da bronz, tranter auter duas spadas cun manetscha entira, in fragment d'ina loma da spada, ina loma da stilet ed ina gluva da decoraziun. Ils chats dateschan per part anc dal temp da bronz mesaun (ca. 15avel–14avel tschientaner a.C.), per part dentant gia da l'entschatta dal temp da bronz tardiv (ca. 13avel–12avel tschientaner a.C.). Ils objects eran plazzads cun premura in il bischen da lain ed eran probablmain in'ufrenda ad in dieu da la funtauna. Tenor retschertgas dendrocronologics pli recentas e vegnida enchaschada la funtauna cun gronda probabilitad il 1466 a.C. Jürg Rageth

Scuol

En il territori communal èn vegnidas scuvertas duas culegnas impurtantas. Sin il Munt Baselgia existiva ina culegna dal temp da bronz e dal temp da fier. Las exchavaziuns dal 1965–68 èn sa concentradas oravant tut sin il plateau sid da la collina ed han mess a la glisch numerus edifizis preistorics sco era parts d'edifizis che servivan per abitar u per exequir lavurs artisanals. Ina colonisaziun cuntinuada è attestada per ina perioda da var 1500 onns.

Las pli veglias chamonas da lain dateschan dal temp da bronz mesaun e da l'emprim temp da bronz tardiv (ca. 15avel–13avel tschientaner a.C., orizont I). Alura suonan pliras fasas da colonisaziun cun la tipica cheramica da la Cultura da Laugen-Melaun (ca. 1200–500 a.C., orizonts II–V), colliada fermamain cun il Tirol dal Sid vischin e cun il Trentin. Ultra da quai han ins era scuvert duas fasas da colonisaziun dal temp da fier cun cheramica da la Cultura da Fritzens-Sanzeno (ca. 5avel–terz usgund tschientaner a.C., orizont VII) ch'ha grondas parallelas en il Tirol dal Nord ed il Tirol dal Sid e ch'è era gia vegnida attribuida ad in circul cultural retic. Ils abitants da la colonia da Scuol-Munt Baselgia eran purs che pratigavan l'agricultura e l'allevament da muvel.

A Russonch, ina terrassa sin la spunda sanestra da la val, han exchavaziuns, exequidas en ils onns 1953, 1959–60 e 2008, mess a la glisch ina stresa da cultura cun restanzas da fieus, fuainas ed ossa fermamain fragmentada e carbonisada. I sa tracta qua d'in uschenumnà lieu d'ufrenda da feu, ina furma specifica dal lieu cultic en il spazi retic. Ils chats dateschan per gronda part dal temp da fier avanzà fin tardiv (ca. 5avel–segund u emprim tschientaner a.C.) e dal temp roman.

Jürg Rageth

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.